

Xpresa bo mes

noticia@awemainta.com

Tur comunicado o remetido cu ser manda pa AWEMainta mester inclui number, fam y number di telefon di e remitente.
AWEMainta ta keda cu e derecho reduci of edita esakinan pa publicacion.

Tur grupo y sin distincion cu ta contra e molinanan na Urirama merece e debido respet

DESDE e anuncio di e proyecto di molinanan di biento na Urirama, fuera di e tradicional obheccionnan husto of no husto, di parti di e partidonan politico den oposicion – varios grupo y tambe varios cuidadano individual pa causanan cu ta varia a protesta contra e proyecto. Te un par di luna pasa y asina leu cu mi sa ta trata di mas o menos cu 10.000 firmante. E causanan ta varia, pero tur tin un meta común: NO n'e molinanan. E gruponan y nan representante y mayoría di individuo mescos cu e causanan ta bon conoci, pues no ta necesario menciona number tampoco especifica e causanan momentáneamente. Den un país democrático manera nos ta considera nos isla, nos mester por asumi y acepta cu cada hende y cada grupo – esaki en realidad no ta nifica nada otro cu un cantidad di hende uni cu un of mas meta común- constitucionalmente tin e sagrado derecho di expresa su mes riba cualquier tópico.

Esaki sin distincion di raza, religión, color, elite of no elite!! E derecho aki di mes no ta encera e derecho pa ofende otro! Un y tur mester respeta e derecho aki y gobernantenan mester ta consciente cu e derecho aki ta prevalece riba cualquier interés personal of cualquier interés político/partidista y no viceversa! Un Gobierno mester ta ehemplar, e mester ta e prome yama y e protagonista mayor den protega y promove e respet p'e derecho di expresion. Den mi concepto un Gobierno cu ta respeta su mes y cu ta desea di ser respeta como tal, mester abstene su mes di lansa cualquier insinuacion inhueto y ofensivo cu por causa daño n'e imagen di cualquier cuidadano of grupo di cuidadano no político den nos comunidad y trece nan den un lus negativo apesar di cualquier diferencia di opinion.

Nos Prome Ministro sr. mr. Mike Eman un rato despues di e grandioso ceremonia solemne n'e ocasion di e celebracion di e 262 existencia y 60 aña di renobacion di nos sagrado Kapel di Alto Vista a haya ta bon pa anuncia o sea ripiti cu lo laga hala e molinanan en cuestion mi no sa cuanto metro mas aya di e Kapel. Esaki evidentemente como un gesto personal noble y di buena voluntad pa trata na acomoda y contenta e grupo di devotonan ainda presente y alabez e radio y televidentenan cu a sigi e ceremonia y cu tambe ta contra e presencia mahos di e molinanan den e sercania di e Kapel.

Si e gesto aki relaciona cu un polémica asina serio y asina controversial durante of corto tempo despues di un ambiente asina festivo y solemne y di e magnitud cu a tuma lugar pa manifesta un abundancia di fe den nos Señor, nos fe Católico y e veneracion di nos Sagrado Virgen di Alto Vista tabata apropiado of no noble of no, ta keda na e prudencia di cada uno pa huzga.

E gesto aki sinembargo segun mi, indirectamente a ensera y refleja un menosprecio grandi p'e preocupacion profundo y continuo di e devotonan mes y e otro gruponan cu ta lucha pa preserva y protega e medio ambiente, nos flora y fauna, e naturalesa precioso y e herencia religioso cultural historico pafor y alrededor di e Kapel. Pa nos papia mes di un ignorancia total p'e reclamo legitimo confirma y reconfirma pa expertonan di afor di parti di e grupo di residentenan di Urirama pa daño eminente cu e maldito aparatonan lo haci na e salud di mas o menos 5000 habitante directamente di e becindario. No esey so!

Publicamente declara cu ta trata di hendenan cu ta representa un grupo di elite den nos comunidad, sin mas ta un falta di respet di cualquier gobernante cu ta respeta su mes y cu ta desea di ser respeta como tal. E ta un actitud no digno di un gobernante. E contexto y e tono den cual a usa e palabra "elite" no por ta nada otro sino pa bagatalisa, ignora, desacredita e grupo mes y e importancia di e significacion di e protesta. E ta un intento cla pa haci daño n'e imagen y e credibilidad di e grupo. Mester enfatisa: Grupo di elite of no elite, tur tin constitucionalmente e mesun derecho pa expresa su mes y sali dilanti protega nan propio interés y interés di otronan.

Ademas no t'e "grupito di elitenan" den nos sociedad t'esnan cu ta contribui den fondo di campaña di partidonan politico cu plaka efectivo y material p.e. den forma di auto, jeep, bus?

Ta bira tempo y ta bon pa nos Prome Ministro cu orguyosamente ta yama su mes e "trekker" di e proyecto y cu tur ora tin e number di nos Creador na boca pa un bez y pa semper hunto cu tur e otro Ministro, Parlamentarionan, experto y conseheronan realisa un cos bon y esey ta lo siguiente.

Si hala e molinanan mes mas aki o mas aya, den mi concepto, e protestanan y hunto cu nan e devocion di e Cristiannan Católico, e adoracion pa nos Señor, e veneracion pa nos Virgen di Alto Vista, e estimacion p'e Kapel y e deseo husto y eminente p'e conservacion y e proteccion di su alrededor lo continua incesantemente. Loke si lo agrada TUR e gruponan ... y t'esey ta loke respetuosamente nan ta pidi, sclama y spera ta SI nos Prome Ministro oficial y públicamente anuncia cu e alrededor di e Kapel y te na Urirama, e medio ambiente y

e flora y fauna, e naturalesa virgen y rustico, e ambiente di pas, tranquilidad, harmonia, nos herencia religioso cultural, e horizonte liber di cosnan mahos, tur loke cu ta contribui y haci di e sitio ey uno asina único pa reflexiona, medita, pa peregrinonan fuente di inspiracion espiritual, keda intacto y sin ningun clase di molina ni mas aki ni mas aya y sin ningun peliger pa e salud, e bida di hende, irrespecto e cantidad di e habitantenan.

No por permiti expone e bida valioso di e ser humano, e bida di inocentenan y flora y fauna n'e merced di hero y beton inútil pa motibonan comercial y mas bien pa cumpli cu afan politico, prestigio y orguyo personal cu no ta sirbi interés general. Cu otro palabra: Conserva y protega en bez di ignora y destrui e alrededor di e Kapel y conserva y protega bida y salud di e hende.

Unabez destrui lo no por haci uso ni di palma, ni di klinkers, ni di kiosko, ni di tram of streetcar cu lo por restaura e lugar y dreche den su estilo di identidad original y autenticidad propio pa nos pueblo y nos futuro generacionnan.

Ta bin acerca y cu tur respet y sin e minimo intencion di ofende ni un solo hende of instancia: Ningun Gobernador, ningun Parlamentario, ningun Ministro, Vader Piet Beheer, Ockels, TNO, Carbon War Room, Elmar, WEB lo por garantisa y devolve na nos pueblo e salud y e bida precioso cu gratuitamente nos a haya como regalo di nos Señor. Nos señor Gobernador Su Excelencia sr. Freddy Refunjol durante su ya acostumbra y elocuente discurso na ocasion di e recepcion di aña 2013 a laga un mensahe cu mi a considera masha simpático y apropia en particular p'e Ministro y Parlamentarionan. Esaki ta: Trata otro y nos pueblo cu frankesa,

honestidad y claridad. No priminti cosnan irealista. Nos distinguido Gobernador no a menciona e palabra "transparencia". Mi ta asumi sinembargo cu esey ta un di e ingredien-tenan cu ta inclui den e virtudnan menciona.

Como cuidadano liber y como comentarista cortésmente mi ta pidi nos gobernantenan aplica e mensahe di nos Gobernador pa splica nos pueblo cuanto e proyecto Urirama inclusive e gastonan ta di e infraestructura y e daño ireparable na nos medio ambiente. Cual lo t'e beneficiacion financiero/económico pa nos pueblo y en particular p'esnan di menos entrada. T'esaki tabata uno di e sagrado promesanan electoral cu a conduci n'e "boedoem 12-8" den stoma.

Relaciona cu e aspecto y e sentimiento religioso cu mi a trece dilanti, mi no por termina sin trece e siguiente mensahe.

Mi ta debidamente consciente y ta acepta plenamente tambe cu lo tin gobernante, lector y otronan cu deliberadamente of no ta ignora, menosprecia, no ta, no por of no kier comprende y hasta ta haci bofon di nos fe Católico, e adoracion na nos Señor, y e veneracion na nos Santo y Virgennan, pero esey t'e pleno derecho constitucional/democrático di cada uno pa tin su propio opinion, pues di diferencia di opinion cu otronan. Tambe riba tereno di religion. Ademas e principionan fundamental di e enseñanza Cristian y nos doctrina y fe Católico siglo tras siglo y cada momento ta siña humanidad, pues cada uno di nos pa nos actitud den nos bida diario refleja respet, compasion, tolerancia (ta sigui: "Stempel"-Parlament? E próximo reunion Urirama lo desenmascara y indica.....)

Milton Delwin Gomez.